

ՀԱՅԵՐԻ ԷԹՆԻԿԱԿԱՆ ՄԱՐԴԱԲԱՆՈՒԹՅԱՆ ՈՒՍՈՒՄՆԱՍԻՐՈՒԹՅԱՆ ԱՐԴԻ ՎԻՃԱԿԸ

Լ. Ա. ԲԱՐՍԵՂՅԱՆ

Հայ ժողովրդի ցեղասերման (էթնոգենեզի) պատմության բարդ հարցերը լուծելիս անհրաժեշտ է պատմական հնագույն գրավոր վկայություններից, հնագիտական ու լեզվագիտական տվյալներից բացի, լայնորեն օգտագործել նաև մարդաբանական տվյալները:

Ներկայումս գիտականորեն հիմնավորված է, որ Կովկասի ժամանակակից բնակչությունը մարդաբանական տեսակետից պատկանում է մեծ եվրոպեոիդ կամ եվրոպական ռասայի հարավային ճյուղին: 1790 թ. Հ. Բլյումենբախը այդ ռասայի բնորոշման համար առաջարկեց կովկասյան ռասա անունը¹: Ի. Դենիկերը մարդկային ռասաների իր դասակարգման մեջ գանգուր և ալեձև մազեր, սպիտակ (թուխ) մաշկ, կախ, դուրս ցցված քիթ և կլոր գանգ ունեցող ցեղերին կոչեց ասսուրատիա²: Հետագայում այս տիպը ընդհանրացվեց Կովկասի բնակչության համար: Ա. Իվանովսկին Կովկասի մարդաբանական տիպերը դասակարգեց ըստ ազգային պատկանելության³:

Կովկասի ժամանակակից բնակչության մշակված մարդաբանական դասակարգումը, որն այժմ ընդունվում է բոլորի կողմից, պատկանում է սովետական անվանի մարդաբան Վ. Վ. Բունակին⁴: Ըստ նրա դասակարգման, Կովկասի ներկայիս բնակչությունը ներկայացված է մեծ եվրոպեոիդ ռասայի երկու տարատեսակներով՝ միջերկրածովյան և պամիրա-ալպյան: Իրենց հերթին միջերկրածովյանը բաժանվում է պոնտական և կասպիական, իսկ պամիրա-ալպյանը՝ պոնտա-ղագրոսյան կամ առաջավոր-ասիական, արմենոիդ և կովկասյան ռասաների:

Այս ռասաներից յուրաքանչյուրից Վ. Բունակը առանձնացնում է հետևյալ ենթառասաները. պոնտականում՝ միջին կուբանական, կասպիականում՝ արևելյան և արևմտյան կասպիական, պոնտա-ղագրոսյանում՝ Ղարաբաղի, լոռի-փամբակյան, սամուրյան (դաղստանյան) և շիրակյան, կովկասյանում՝ լիախվա-ալաղանյան, դվիրիլյան, ներքին-ռիոնյան, բարձրլեռնային, վերին-թերեքյան և ներքին արդունյան: Այսպիսի նեղ, լոկալ տիպերի է բաժանում նաև արևմտա-կասպիական ենթառասան, որտեղ հանդես են գալիս ներքին-քուռյան, արաքսյան և էլբուրսյան տիպերը:

¹ J. F. Blumenbach, Decas Collectionis suae Craniorum diversarum gentium illustrata, Gotingen, 1790.

² И. Деникер, Человеческие расы. С. Петербург, 1902.

³ А. А. Ивановский, Опыт антропологической классификации населения России, «Русск. антр. журнал», 1903, № 3—4.

⁴ В. В. Буняк, Антропологический состав населения Кавказа, «Вестник Гос. Музея Грузии», т. XIII—А, 1946.

Ն. Չեբոկսարովի մարդաբանական նոր դասակարգման մեջ Կովկասի բնակչությանը տեղ է հատկացվում մի կողմից՝ միջերկրա-բալկանյան և մյուս կողմից՝ առաջավորասիական ռասաներում, որոնք կաղմում են մեծ եվրոպեոիդ ռասայի հարավային ճյուղը⁵։ Վերջերս այդ ռասային տրվում է նաև հնդկա-միջերկրածովյան անունը։

Գ. Ֆ. Դեբեցը Կովկասի արդի բնակչության մեջ առանձնացնում է չորս տիպ՝ կասպիական կամ Ադրբեջանի բնակչության տիպ, կավկասիոնյան կամ Մեծ Կովկասյան բարձրավանդակի բնակչության տիպ⁶, առաջավորասիական կամ Հայաստանի և Արևելյան Վրաստանի բնակչության տիպ և պոնտական կամ Կուբանի բնակչության տիպ⁷։

Յա. Ռոգինսկին և Մ. Լեինը Կովկասի բուն բնակչությունը տեղադրում են երկու մեծ եվրոպեոիդ ռասաների՝ բալկանա-կովկասյանի և հնդկա-միջերկրածովյանի միջև⁸։ Վերջինս ընդգրկում է Հնդկաստանից մինչև Ատլանտյան օվկիանոս ընկած տարածությունը և իր հերթին բաժանվում է երեք մեծ ենթառասաների՝ հնդկա-պամիրյան, միջերկրա-բալկանյան և առաջավորասիական։

Միջերկրա-բալկանյան տիպը բնութագրվում է ալեձև ու խիստ դարգացած մազե ծածկով, նեղ և խիստ ընդգծվող դեմքով, ֆեղ և ոչ շատ դուրս ընկած քթով, քիչ հաստ շրթներով։ Այս խումբը գերակշռում է Հարավային Եվրոպայի և Հյուսիսային Աֆրիկայի բնակչության մեջ։ Կաղմաբանական տեսակետից նրան է հարում և նմանվում հնդկա-պամիրական խումբը, որի ներկայացուցիչների տարբերությունը կաղմում է բավական խիստ արտահայտված թուխ մաշկը։ Հնդկա-պամիրական խումբը լայն տարածում ունի Միջին Ասիայում (տաջիկներ, ուզբեկներ, թուրքմեններ), Աֆղանստանում, Իրանում և Հյուսիսային Հնդկաստանում։ Անդրկովկասում, Միջագետքում, Սիրիայում, Պաղեստինում և Իրաքում բնակվող ժողովուրդները պատկանում են առաջավորասիական ենթառասային։ Անդրկովկասում առաջավորասիական տիպը հանդես է գալիս կոլխյան, իբերյան, արմենական ու ասսուրական տիպերով, որոնցից մի քանիսն ունեն նաև իրենց լոկալ տարբերակները (արմենոիդ-դարաբադյան, վանա-ուրմյան, լոռի-փամբակյան, շիրակյան)։

Առաջավորասիական մարդաբանական տիպը հայտնի է հնագույն ժամանակներից, նա լայնորեն տարածված էր Միջագետքի հարավից մինչև Տիգրիսի ու Եփրատի վերին հոսանքները, Անատոլիական բարձրավանդակի և վերին Իրանի շրջաններում։ Գ. Ֆ. Դեբեցի կարծիքով առաջավորասիական խմբի ներկա տարածման տվյալները թույլ են տալիս ասելու, որ նրա ձևավորումը տեղի է ունեցել մոտավորապես այն տերիտորիայում, որտեղ ալժմ նա տարածված է ու գոյություն ունի⁹։

⁵ Н. Н. Чебоксаров, Основные принципы антропологических классификаций, «Тр. ин-та этнографии», Новая серия, т. XVI, 1951.

⁶ Մարդաբանական այս տիպը 1954 թ. առաջին անգամ առանձնացրել են վրաց մարդաբաններ Ա. Ն. Նաթիշվիլին և Դ. Մ. Արդուշելիշվիլին։

⁷ Г. Ф. Дебеч, Антропологические типы. Народы мира, Народы Кавказа, I, Москва, 1960.

⁸ Я. Я. Рогинский, М. Г. Левин, Основы антропологии, М., 1955.

⁹ Г. Ф. Дебеч, Заселение Южной и Передней Азии по данным антропологии, «Труды Ин-та этнографии», Новая серия, т. XVI, 1951, էջ 366։

Ինչպես ցույց է տալիս հնէամարդաբանական նյութը, Առաջավոր Ասիայում հնագույն ժամանակներից գերիշխում էր դոլիխոկրան (երկարադանգ) տիպը: Հենց այս նույն տերիտորիայում էլ հետագայում առաջացել ու կազմավորվել է ժամանակակից բրախիկրան (կարճադանգ) առաջավորասիական տիպը:

Մարդաբանական բազմաթիվ դիտումները ցույց են տվել, որ ներկա հայության մի ստվար մեծամասնությունն ունի մթագույն մաշկ, թուխ մազ ու աչք, լայն, կլոր գլուխ և դեմք, կարճ գանգ, լայնկեկ քիթ և միջահասակ ու հաստակազմ մարմին (հայերի փոքր մասի համար է բնորոշ բաց դուլնի մաշկը, մազերն ու աչքերը, նեղ դեմքն ու երկար գլուխը, նեղ, ուղիղ և արծվային քիթը, բարձրահասակ ու նրբակազմ մարմինը): Մարդաբանական այս տիպը, որը մարդաբան Ֆ. Լուշանի կողմից կոչվեց «արմենոիդ», նույն առաջավորասիական տիպն է:

Լուշանը արմենական է համարում բարձր ու կլոր գլուխ, տափակ ծոծրակ և արծվի ռունգ ու թխադեմ մարդաբանական հատկանիշներ ունեցող ժողովուրդներին, որոնք մինչև սեմական ու հնդեվրոպական ժողովուրդների զաղթը վաղուց զբաղեցրել էին Առաջավոր Ասիան¹⁰: Մարդաբանական այս տիպը հայտնի է եգիպտական XIX դինաստիայի բարձրաքանդակներից, որտեղ պատկերված են եգիպտացիների դեմ պատերազմող խեթերը, որպես ծայրահեղ կարճ գանգ, բոլորովին տափակ ծոծրակ, շատ խիստ, ետ ընկած ձակառ. դուրս ցցված ու թեթև կոր քիթ, փոքր բերան ու ծնոտ, փոքր-ինչ ծամված դիմագիծ ունեցող մի ժողովուրդ: Այս տիպը կրկնվում է նաև խեթական բարձրաքանդակներում, որտեղ, սակայն, մարդաբանական բնորոշ գծերը այնքան հատուկ, կենդանի կերպով չեն ներկայացվում, ինչպես պատկերում էին եգիպտական արվեստագետները¹¹: Ա. Գյոտցեի կարծիքով ինչպես եգիպտական, այնպես էլ խեթական բարձրաքանդակների տվյալները պետք է ընդունել մեծ վերապահությամբ, քանի որ մարդաբանական նպատակներով նրանց օգտագործումը պահանջում է դեն նետել այն հատկանշական գծերը, որոնք տրվել են արվեստագետների կողմից ուժի հաշվին:

Ա. Գյոտցեն գտնում է (Հ. Շենյուրեկի, Կանսուի, Կրոգմանի նման), որ արմենոիդ տիպը Փոքր Ասիայում հնագույն ժամանակներից ընդհանրապես գոյություն չի ունեցել, որ այստեղ հիմնականում տիրապետող է եղել երկարադանգ-դոլիխոկրան տիպը, իսկ կարճադանգ-բրախիկրան տիպը սկսում է հանդես գալ միայն վաղ բրոնզի դարաշրջանից հետո, խեթերի ժամանակ, որպես ներգաղթ կատարած ցեղերի տիպ: Նրա կարծիքով բրախիկրանների զգալի աճը Առաջավոր Ասիայում պետք է բացատրել միմիայն հնդեվրոպական խեթա-նեսիտական ցեղերի ներգաղթով: Ըստ Գյոտցեի, արդեն բրոնզի դարի ժամանակաշրջանում Առաջավոր Ասիայում միմյանց կողքի գոյություն ունեին մարդաբանական միջերկրածովյան ռասային պատկանող դոլիխոկրան և ալպիական ռասային պատկանող բրախիկրան ցեղեր:

Նման տեսություն իր ժամանակին մշակել էր նաև արևմտահայ մարդաբան Ռ. Քերումյանը, որը բրախիկրան արմենոիդներին կապում էր Բալկան-

¹⁰ F. Luschan, The early inhabitants of Western Asia, „The Journal of the Royal Anthropological Institute of Great Britain and Ireland“, vol. XLI, 1911, էջ 221—244.

¹¹ A. Goetze, Kleinasien, München, 1957, էջ 10—11.

յան թերակղզին զբաղեցրած մարդաբանական դինարյան ռասայի հետ, մարդաբանական հատկանիշների և ոչ մի տարբերություն չգտնելով այդ տիպերի միջև: Նրա կարծիքով բրախիկրան տիպի նախահայրենիքը Եվրոպան է, իսկ Առաջավոր Ասիայում այդ տիպի հանգես գալը կապված է Եվրոպայից կատարված ներգաղթի հետ¹²:

Հետաքրքիր է այն փաստը, որ վերջերս ուշ տրիպոլյան դամբարաններից դուրս եկած մարդաբանական նյութերի մեջ (նեղվիսկոյում պեղված դամբարանից) հայտնաբերվել է նաև արմենոիդ հատկանիշներով մի գանգ, որը վկայում է տրիպոլյան բնակչության կազմում արմենոիդների գոյության մասին դեռևս IV—III հազարամյակներում մ. թ. ա.¹³:

Գ. Ֆ. Դեբեցը արևմտյան մարդաբանների (Գ. Գյունտեր, Կ. Կուն) կողմից Առաջավոր Ասիայում ապրող հնդեվրոպական ժողովուրդների ծագումը եվրոպեոիդ ռասայի հյուսիսային կամ շիկամաղ ճյուղի հետ կապելու փորձերը համարում է տենդենցիոզ և մտացածին: Նա գտնում է, որ առաջավորասիական տիպի ձևավորումը տեղի է ունեցել տեղական սուբստրատի վրա և որ հայերի մարդաբանական կերպարի մեջ դեռևս չի բացահայտվել այնպիսի տարր, որը հնարավորություն տար ասելու, թե այն Առաջավոր Ասիա է թափանցել հնդեվրոպական ցեղերի տարածման ժամանակ¹⁴: «Առաջավոր Ասիայի մարդաբանությունը նվիրված աշխատություններում,— գրում է Գ. Ֆ. Դեբեցը, —հաճախ են տեղ գտնում այնպիսի եզրահանգումներ, ըստ որոնց այստեղ գոյություն են ունեցել «նորդական» և «նախանորդական» տիպեր: Բավական է ժամանակակից բնակչության մեջ տեսնել բաց գույնի մազ և աչքեր, որպեսզի այդ բացատրվի հյուսիսային ռասայի ներգաղթի միջոցով: Այսպիսի «հայտնագործությունները» երբեմն արվում են գանգերի տեսակավորման պարզունակ հնարքներով: Այսպես, օրինակ, Կրոգմանը Թեփե-Հիսարում (Իրան) հայտնաբերված գանգերի մեջ տեսնելով ավելի մասսիվը և ավելի նուրբը, գտնում է, որ առաջինները նախանորդական են, իսկ երկրորդները՝ միջերկրածովյան»¹⁵: Գ. Ֆ. Դեբեցի կարծիքով մարդաբանությունն այստեղ գործ ունի առաջին հերթին նորմալ տարափոխության հետ: Այսպիսի մեթոդով էլ (գանգերի հետագա զարգացումը և տարափոխությունը) նա դասակարգում է նաև առաջավորասիական կամ արմենոիդ մարդաբանական տիպը, բոլոր դեպքերում էլ հիմնական ցուցիչ համարելով բրախիկրան գանգը:

* * *

Ուսումնասիրությունները ցույց են տվել, որ Հայկական լեռնաշխարհի անհիշելի ժամանակներից ունեցել է հարուստ բուսական և կենդանական աշխարհ:

Չնայած Հայաստանի տերիտորիայում դեռևս չեն հայտնաբերվել բրածո մարդու մնացորդներ, սակայն Վրաստանում հայտնաբերված մարդանման

¹² R. Kherumian, A l'anthropologie du Caucase — Les arméniens, Paris, 1943.

¹³ Т. С. Пассек, История племен в V—III тысячелетиях до н. э. на территории Молдавии, «Краткие сообщения ин-та археологии», 1965, № 105, էջ 9:

¹⁴ Г. Ф. Дебеч, Заселение Южной и Передней Азии по данным антропологии, էջ 366:

¹⁵ Նույն տեղում, էջ 361:

կապի, այսպես կոչված Ուղաբնուպիտեկի¹⁶ մնացորդները, Ջվեմո-Ջոդի գյուղից հայտնի նեանդերթալցու ատամը¹⁷, ինչպես և պատմական Կորճայքի լեռներում Շանիդարի քարայրից գտնված մարդաբանական նյութերը¹⁸ հավատ են ներշնչում, որ Անդրկովկասը հարել է մարդու կազմավորման առաջավորասիական արեալին: Հետագա ժամանակաշրջաններից հայտնաբերված հնադիտական և քիչ ուշ՝ մարդաբանական նյութերն արդեն վկայում են մարդու անընդմեջ գոյությունը ողջ Անդրկովկասում և Հայկական լեռնաշխարհում:

Հայաստանում հայտնաբերված ամենահին հնէամարդաբանական նյութերը վերաբերում են էնեոլիթյան (IV—III հազ. մ. թ. ա.) ժամանակաշրջանին և հնարավորություն են տալիս հենց այդ ժամանակաշրջանից էլ հետևել մեր լեռնաշխարհի հնագույն բնակիչների ֆիզիկական կերպարին:

Մեզ հայտնի էնեոլիթյան ժամանակաշրջանի հնէամարդաբանական նյութերը հայտնաբերվել են Հրազդանի շրջանի Ջրառատ գյուղի մոտ (1954 թ.)¹⁹ և Երևանի տերիտորիայում գտնվող Շենգավիթ հնավայրում (1955 թ.)²⁰, դամբարանների պեղումներից:

Ջրառատի մոտ հայտնաբերված հնէամարդաբանական ողջ նյութը ամենից առաջ բնութագրվում է եվրոպեոիդյան յուրահատկությունների ուժեղ արտահայտվածությամբ, որտեղ հատկապես աչքի է ընկնում դիմակմախքի փոքր լայնությունը: Ջրառատի հնէամարդաբանական նյութը զգալի զուգահեռներ և կրկնություններ ունի հանձինս Ցամաքաբերդի և Նորադուզի դամբարաններից հայտնաբերված գանգերի, որոնք մոտ են կանգնած եվրոպեոիդ ռասայի հարավային ճյուղի գանգերին:

Շենգավիթից հայտնի են հինգ կմախքներ՝ ոչ լավ պահպանված գանգերով: Այս գանգերը դոլիխոկրան են, լայն ճակատով և դուրս ընկած ծոծրակով, դիմակմախքի միջին լայնությամբ: Ճակատը քիչ թեք է, ակնախոռոչները ուղղանկյուն են, այտոսկրները՝ թույլ արտահայտված: Քթարմատը և քթոսկրները քիչ տափակ են: Շենգավիթի գանգերն ուսումնասիրող Հ. Ազիզյանը դրանք համարում է նախաեվրոպեոիդ, դոլիխոկրան տիպ²¹:

Հայաստանի բրոնզի և երկաթի դարաշրջանների հնէամարդաբանական նյութերի ուսումնասիրությունը ցույց է տալիս, որ այս ժամանակահատվածում էլ Հայկական լեռնաշխարհում, Անդրկովկասում և Հյուսիսային Կովկասում անընդմեջ պահպանվել է էնեոլիթի ժամանակաշրջանի մարդաբանական կերպարը և ցեղերի ծագման ընդհանրությունը²²: Հայաստանի էնեոլիթ-

¹⁶ Н. О. Бурчак-Абрамович, Е. Г. Габашвили, Высшая человекообразная обезьяна из верхнетретичных отложений Восточной Грузии (Кахетия), «Известия» Гос. муз. Грузии», XIII—A, 1946.

¹⁷ А. К. Габуния, Д. М. Тушабрамишвили, А. К. Векуа, Первая находка остатков мустьерского человека на Кавказе, «Вопросы антропологии», вып. 8, 1961.

¹⁸ R. S. Solecki, Three adult neanderthal skeletons from shanidar, cave, «Northern Iraq», Washington, 1960, էջ 603—604.

¹⁹ Վ. Պ. Ալեքսեև, Ուշ բրոնզի և վաղ երկաթի դարաշրջանի Հայաստանի բնակչության երկու խմբի մասին, ՀՍՍՀ ԳԱ «Տեղեկագիր» (հաս. դիտ.), 1964, № 1, էջ 20:

²⁰ Г. Азизян, О черепках из энеолитических погребений в районе Шенгавита, «Мамонт-ранаширական հանդես», 1963, № 3, էջ 327—332:

²¹ Նույն տեղում:

²² В. П. Алексеев, Итоги изучения палеоантропологии Кавказа, «Мамонт-ранаширական հանդես», 1963, № 2, էջ 140—141:

յան, բրոնզի և հրկաթի դարաշրջանների գանգերի տվյալները իրենց եվրոպեոիդյան առանձնահատկություններով համարյա չեն տարբերվում ժամանակակից հայերի գանգաբանական տվյալներից²³:

1956—1958 թթ. գանգաբանական առատ նյութեր հայտնաբերվեցին Սևանա լճի ցամաքած տերիտորիայում, լճաշեն գյուղի մոտ կատարված պեղումների շնորհիվ: Այդ նյութը հիմնականում վերաբերում է միջին բրոնզի դարաշրջանին:

Հայտնաբերված գանգերը դոլիխոկրան և մեղոկրան են, դրանց մեջ բացակայում են բրախիկրանները²⁴: Իրենց հատկանիշներով և կազմաբանական մի շարք առանձնահատկություններով լճաշենի գանգերը որոշակիորեն տարբերվում են ինչպես Սևանի ավազանից հայտնի, այնպես էլ ժամանակակից հայերի գանգերից²⁵:

1925 թ. Երևանի հիդրոկայանի կառուցման ժամանակ, Հրազդանի կիրճում, Ծիծեռնակաբերդից ոչ շատ հեռու պատահաբար հայտնաբերվել էր մի կմախք, որը հնագետ Ա. Քալանթարի կողմից դասվել էր կրոմանյան և նեանդերթալյան մարդու միջև²⁶: Հետագայում Բ. Ն. Վիշնևսկին անդրադառնալով այդ գյուտին, շատ աղքատիկ նյութի տվյալների հիման վրա հանգեց այն մտքին, թե մենք գործ ունենք նեոլիթի դարաշրջանին պատկանող հյուսիսեվրոպեոիդ ռասայի ներկայացուցչի հետ²⁷: Սակայն Բ. Ն. Վիշնևսկու դրույթները պաշտպանություն չգտան ինչպես թվագրման, այնպես էլ դասակարգման հարցում²⁸:

Գանգերի մի մեծ խումբ էր հայտնաբերել հնագետ Ե. Լալայանը Նոր-Բայազետի (ներկայիս Կամոյի) շրջանում կատարած պեղումների ժամանակ, որոնք, սակայն, կազմաբանորեն հստակ չեն²⁹: Վ. Բունակը, նկարագրելով Սևանա լճի ավազանում Ե. Լալայանի կողմից հայտնաբերված գանգերի այդ շարքը, գտնում էր, որ դրանք պատկանում են եվրոպեոիդ ռասայի հյուսիսային ճյուղի ներկայացուցիչներին: Նա ձգտում էր ապացուցել, որ ուշ բրոնզի և վաղ երկաթի դարաշրջանների Հայաստանի բնակչության մեջ զգալի մաս են կազմել հյուսիսային ծագում ունեցող տարրերը, որոնք ծագումնաբանությամբ մերձենում են Հյուսիսային Գերմանիայի և Սկանդինավիայի բնակչության գանգաբանական տիպերին³⁰:

Ավելի ուշ, անդրադառնալով այս գանգերի բնութագրմանը, Գ. Ֆ. Դեբեցը իրավացիորեն նկատեց, որ Վ. Բունակը իր ենթադրությունների մեջ թույլ է տվել անձնություններ: Գ. Ֆ. Դեբեցը համոզիչ փաստարկներով ցույց տվեց,

²³ Նույն տեղում:

²⁴ Г. Азизян, Палеоантропологический материал из погребений у селения Лчашен, «Պատմա-բանասիրական հանդես», 1965, № 3, էջ 306—316:

²⁵ Նույն տեղում, էջ 314:

²⁶ А. Калантар, Сообщение о находке ископаемого человека в Армении, «Тр. II съезда зоологов, анатомов и гистологов СССР в Москве, 1925», Москва, 1925.

²⁷ Б. Н. Вишневский, Палеоантропологическая находка близ Эривани, «Советская этнография», 1934, № 4—5:

²⁸ Г. Ф. Дебец, Палеоантропология СССР, էջ 106—107:

²⁹ Е. А. Лалаян, Археологические раскопки в Ново-Баязедском уезде ССР Армении, «Русск. антр. журнал», XVII, вып. 3—4, 1929.

³⁰ В. В. Буняк, Черепа железного века из Севанского р-на Армении, «Русск. антр. журнал», т. XVII, вып. 3—4, 1929.

որ Անդրկովկասի, ինչպես և ողջ Կովկասի ժամանակակից գանգաբանական նշանների համադրումը վկայում է նրանց եվրոպեոիդ ռասայի հարավային ձյուղին պատկանելու մասին և որ հիմքեր չկան պնդելու, թե Հայաստանի հնագույն բնակչությունը առաջին հերթին բնութագրվել է կապտաշությամբ և շիկահերությամբ³¹:

Երկար ժամանակ Վ. Բունակի նկարագրած նյութը Հայաստանում միակն էր, և միայն 1954 թ. Յամաքաբերդ գյուղի մոտ (Սևանա լճի ափին) պեղված դամբարաններից դուրս եկած գանգերը լրացրին եղած բացը³²: Այդ նորահայտ նյութերը օգնեցին թվագրելու Ե. Լալայանի պեղումներից հայտնի վերք նշված նյութը, որը պատկանում է վաղ երկաթի ժամանակաշրջանին՝ մ. թ. ա. I հազարամյակի առաջին դարերին:

Վ. Պ. Ալեքսեևը, ծանոթանալով Յամաքաբերդի գանգաբանական նյութերին, նշում է, որ այդ գանգերը բնութագրվում են բոլոր հիմնական պարամետրերի խիստ մեծ չափերով և, մասնավորապես, ղգալի լայն դեմքով³³: Նկարագրելով Յամաքաբերդի գանգերը, Վ. Պ. Ալեքսեևը գրում է. «Միաժամանակ դրանք չափազանց զանգվածեղ են, որը թույլ է տալիս դրանք մերձեցնել եվրոպեոիդ ռասայի հնագույն լայնադեմ տարբերակին: Ապա նաև՝ Վ. Վ. Բունակի նկարագրած սերիան բնութագրվում է նեղադիմությամբ և այդ առումով մոտ է ամենանեղադեմ եվրոպեոիդ սերիաներին: Ընդհանուր առմամբ խստորեն աչքի է ընկնում Յամաքաբերդի գանգերի տարբերությունը Սևանա լճի հարավ-արևելյան ափի գանգերից և, եթե հիմնվենք միայն այդ երկու սերիայի բնության վրա, կարելի է գալ այն եզրակացության, որ բրոնզի և վաղ երկաթի դարաշրջանների սահմանագլխին Սևանի հարավային ափը բնակեցված է եղել տարասեռ մարդաբանական տիպի բնակչությամբ: Մյուս կողմից, Յամաքաբերդի դամբարաններից դուրս եկած գանգերը սակավաթիվ են, ուստի և ընտրության պատահականությունը չի կարելի լիովին բացասել»³⁴:

Յամաքաբերդի դամբարաններին հասակակից դամբարաններ պեղվել են նաև Սևանա լճի ափին գտնվող Նորադուզ գյուղի մոտ՝ Շորգյուլ կոչվող վայրում: Այդ դամբարաններից հայտնաբերված գանգերը ներկայումս պահվում են Կամո քաղաքի գավառագիտական թանգարանում³⁵: Վ. Պ. Ալեքսեևը ուսումնասիրել է թանգարանում գտնվող տղամարդու յոթ և կանացի ութ գանգ՝ սեռային պատկանելությունը որոշելով գանգերի կազմաբանական յուրահատկությունների հիման վրա³⁶: Նորադուզի այս խմբի գանգերը բնութագրվում են եվրոպեոիդային յուրահատկությունների խիստ արտահայտված կոմպլեքսով: Հատկապես իրեն զգացնել է տալիս քթոսկրների ցցվածությունը և քթարմատի բարձրությունը բնութագրող բոլոր չափերի խիստ մեծ չի ները: Դիմակմախքը իր կազմությամբ կրկնում է Յամաքաբերդի և Վ. Վ. Բու-

31 Г. Ф. Дебел, Палеоантропология СССР, էջ 175—177:

32 Պեղումները զխավորել է Հ. Հ. Մնացականյանը:

33 Վ. Պ. Ալեքսեև, Ուշ բրոնզի և վաղ երկաթի դարաշրջանի Հայաստանի բնակչության երկու խմբի մասին, ՀՍՍՀ ԳԱ «Տեղեկագիր» (հաս. դիտ.), 1964, № 1, էջ 17:

34 Նույն տեղում, էջ 17—18:

35 Այդ վայրում Ե. Լալայանից բացի պեղումներ է կատարել նաև հնագետ Հ. Ա. Մարտիրոսյանը:

36 Վ. Պ. Ալեքսեև, նշվ. աշխ.:

նակի նկարագրած սերիաները: Վ. Պ. Ալեքսեևը հանգել է այն եզրակացության, որ Սևանա լճի հարավային ափի բնակչությունը ուշ բրոնզի և վաղ երկաթի դարաշրջաններում եվրոպեոիդային յուրահատկությունների արտահայտվածությամբ չի տարբերվել արդի հայերից³⁷: Նորադուդի գանգերը աչքի են ընկնում դեմքի զգալի չափերով և նույնիսկ շեն ղիջում նույն ժամանակաշրջանի նախաեվրոպեոիդ տիպին վերաբերող հնէամարդաբանական սերիաների համանման չափերին, որոնք հայտնի են Սովետական Միության տիրիտորիայի տարբեր տեղերից: Գ. Ֆ. Դերեցը այդ հատկանիշները կրող գանգերին տվել է կրոմանիոնյան անվանումը³⁸:

Նորադուդյան գանգերը ունեն նաև դեմքի զգալի բարձրություն: Դիմային չափերի ալսպիսի յուրակերպ փոխհարաբերությունը զգալիորեն զատում է վերոհիշյալ սերիան նույն ժամանակի հնէամարդաբանական սերիաների մեծամասնությունից, միաժամանակ մերձենալով Ցամաքաբերդի գանգերին:

Վ. Պ. Ալեքսեևը Ցամաքաբերդի և Նորադուդի տվյալները քննելիս նշում է, որ դեմքի մեծ չափերը Սևանի մերձափնյա գերեզմանների սերիայում ուղեկցվում են գանգատուփի զգալի բարձրությամբ: Ալսպիսի հատկանիշներով դրանք շեն տարբերվում Առաջավոր Ասիայի առավել հին սերիաներից: Ե. Լալայանի պեղումներից հայտնի գանգերի և Ցամաքաբերդի ու Նորադուդի գանգերի տարբերությունը հատկապես դրսևորվում է գիմաչափերի մեջ: Փաստորեն Սևանա լճի ավազանում հանդես են գալիս նեղադեմ և լայնադեմ գանգերի խմբեր, որոնց առկայությունը անհնար է անտեսել:

Վերևում արդեն նշեցինք, որ 1954 թ. Սևանա լճից ոչ շատ հեռու (20 կմ), Հրազդանի շրջանի Զրառատ գուղի մոտ Հ. Հ. Մնացականյանի կողմից պեղված էնեոլիթյան ժամանակաշրջանի դամբանաթմբից գանգեր էին գտնվել: Ցամաքաբերդի և Նորադուդի հնէամարդաբանական նյութերը իրենց եվրոպեոիդյան հատկանիշների արտահայտվածությամբ կրկնում են Զրառատի նյութերն ու նման են ներկայիս հայկական գանգաբանական տիպերին³⁹:

Զրառատի գանգերի դիմակմախքի նվաղ լայնությունը և նրա համադրումը Սևանա լճի ափին պեղված դամբարանների գանգերի հետ թույլ է տալիս ասելու, որ մերձսևանյան հնադուդյն բնակչությունը պատկանելիս է եղել եվրոպեոիդ մեծ ռասայի նեղադեմ տիպին:

Վ. Պ. Ալեքսեևի կարծիքով «...Զրառատի մոտի ոլդնձաքարյան թաղումների գանգերի և Սևանա լճի հարավ-արևելյան ափի թաղումների համադրումը թույլ է տալիս դնել ծագումնաբանական կապերի հարցը այդ երկու խմբի միջև և դրականորեն պատասխանել դրան: Ըստ երևույթին, այժմ մենք կարող ենք պնդել, որ բնակչության ժառանգականությունը մեխանիզմի շրջանում բրոնզի դարաշրջանի ընթացքում համեմատյալ դեպս եղել է: Այդ նշանակում է, որ մեր կողմից առանձնացված երկու խմբերից նեղադեմ խումբը ունի տեղական ծագում և սկիզբ է առնում նույն շրջանի ավելի վաղ բնակչությունից, նկատի առնելով, հարկավ, որ խոսքը վերաբերում է ոչ թե նեղ, տեղափակ (լոկալ) վայրի, այլ ամբողջ Սևանի ափին հարող բավականին ընդարձակ տերիտորիային»⁴⁰:

³⁷ Նույն տեղում, էջ 19:

³⁸ Г. Ф. Дебелев, Палеоантропология СССР, էջ 177:

³⁹ Վ. Պ. Ալեքսեև, նշվ. աշխ., էջ 20:

⁴⁰ Նույն տեղում, էջ 20—21:

Ցամաքաբերդի և Նորադուզի գանգերը դեմքի մեծ չափերով տարբերվում են Առաջավոր Ասիայի և Սամթավրոյի գանգերից ու հին գանգաբանական տարբերակներից⁴¹։ Որպես բացառություն կարելի է մատնանշել Սիալկի գանգերը, որոնք, սակայն, նկատելիորեն ավելի կլորագլուխ են։ Մերձավոր համադրման օրինակ է հանդիսանում Մինգեշաուրի ավելի ուշ թաղումների սերիան (մ. թ. ա. VII—V դդ.), որտեղ կաղմաբանական նմանությունը լրացվում է նաև հնագիտական նյութի ղգալի ընդհանրությամբ⁴²։

Վ. Պ. Ալեքսեևի եղրահանգումն այն է, որ Անդրկովկասի տերիտորիայում լայնադեմ տիպը երևան է եկել հյուսիսային մարդերից կատարված գաղթի հետևանքով և լայնորեն ներկայացված է բրոնզի ու վաղ երկաթի դարաշրջանի թաղումներով։ Այս տիպը շատ է տարածված Խուսական հարթավայրի և Ստորին Պովոլժյեի տերիտորիայում, մինչդեռ հարավում՝ Առաջավոր Ասիայում, հանդիպում է միայն մի գերեզմանում (Սիալկ)։

Այսպիսով, Սևանի ավազանից մեղ հայտնի հնէամարդաբանական նյութը պարզորոշ ցույց է տալիս, որ լճի հարավային ափի բնակչությունը ուշ բրոնզի և վաղ երկաթի դարաշրջանում տարբերվել է իր մարդաբանական տիպով, որ Սևանի ավազանի հարավ-արևելյան շրջանները բնակեցված են եղել նեղադեմ եվրոպեոիդներով, իսկ արևմտյան (Ցամաքաբերդ-Նորադուզի) շրջանը՝ լայնադեմ եվրոպեոիդներով⁴³։ Բոլոր հիմքերը կան ասելու, որ նեղադեմ տիպը Հայաստանի տերիտորիայում հայտնի է ավելի վաղ ժամանակներից և, ըստ երևույթին, ունի տեղական ծագում⁴⁴։

Արդեն նշեցինք, որ լայնադեմ տիպը ընդհանրություններ ունի Սիալկի և Մինգեշաուրի հնագույն բնակչության մարդաբանական տիպի հետ։ Թե այդ տիպը Անդրկովկասում երբ է հանդես եկել և որտեղից՝ դժվար է ասել։

Մ. թ. առաջին հազարամյակի սկզբների Հայաստանի բնակչության հնէամարդաբանական նյութերը մարդաբաններին դեռևս ծանոթ չեն։ Մեղ հայտնի վաղ միջնադարյան դամբարաններից (Գառնի) դուրս եկած մարդաբանական նյութերը դեռևս հրապարակված չեն, չնայած մասնակիորեն դրանք ուսումնասիրվել են (Հ. Ա. Ազիզյան)։ Իր առանձնահատկություններով վաղ միջնադարյան հնէամարդաբանական նյութը միջանցիկ տեղ է գրավում վաղ երկաթի դարաշրջանի Հայաստանի բնակիչների և ժամանակակից հայերի միջև⁴⁵։ Միջնադարյան գանգերի դեմքի լայնությունը ավելի մեծ է, քան Սևանա լճի ավազանի հարավ-արևելյան մասի վաղ երկաթի դարաշրջանի գանգերինը և ընդհակառակը՝ ավելի փոքր, քան նույն վայրի արևմտյան խմբինը⁴⁶։

Փաստորեն միջնադարյան Հայաստանի բնակչության մարդաբանական կերպարի ձևավորումը ընթացել է վաղ շրջանի լայնադեմ և նեղադեմ տիպերի ձուլման ճանապարհով։ Կլորագանգ տիպերի տեսակարար կշիռը միջնադարում աճում է։ Քանի որ իրենց դեմքի լայնությամբ այդ կլորագանգ տիպերը

⁴¹ В. В. Буняк, Древнейшие краниологические типы Передней Азии, «Краткие сообщ. ин-та этнографии», вып. 11, 1947.

⁴² Р. М. Касимова, Антропологическое исследование черепов из Мингечаура, Баку, 1960, էջ 20—32։

⁴³ Վ. Պ. Ալեքսեև, նշվ. աշխ., էջ 21։

⁴⁴ Նույն տեղում։

⁴⁵ В. П. Алексеев, Итоги изучения палеоантропологии Кавказа, էջ 146։

⁴⁶ Նույն տեղում։

համարյա չեն տարբերվում երկարագանգ տիպերից, ապա այդ պրոցեսի հր-նարավոր և լավագույն բացատրությունն այն է, որ այստեղ մարդաբանու-թյունը գործ ունի սովորական բրախիկեֆալիզացիայի (կարճագլխայնացման) հետ⁴⁷։ Առկա նյութերի քննությամբ պարզվում է, որ Կովկասի մարդաբանա-կան տիպերի պատմության մեջ ամենամեծ դերը կատարել է եվրոպեոիդ եր-կու մեծ ռասաների՝ նախակերպային մի շարք առանձնահատկություններ պահպանած զանգվածեղ և լայնադեմ տիպի ու եվրոպեոիդ ռասայի հարա-վային ձյուղի մեջ մտնող նեղադեմ տիպի փոխներգործությունը⁴⁸։ Ավելի ուշ ժամանակաշրջաններում այլ ռասաների ներկայացուցիչների հետ շփումը նշանակալից ազդեցություն չի թողել Հայաստանի տեղական բնակչության մարդաբանական կազմի ձևավորման վրա։

* * *

Ամեն մի ժողովուրդ իր էպիկական հերոսների արտաքին հատկանիշները միշտ գունեղ է տիպավորել, նրանց մեջ մարմնացնելով գեղեցիկի ու առնա-կանի հասկացությունը։ Մական հերոսների նկարագրման ժամանակ երբեք նրանց չեն վերագրվել այնպիսի հատկանիշներ, որոնք ընդհանրապես խորթ էին տվյալ ժողովրդի համար։

Հայերի մարդաբանական հատկանիշների առաջին նկարագրությունը տվել են միջնադարյան հայ պատմիչները, քնարերգուները և գուսանները։ Հակառակ հույն պատմիչների ունեցած սովորության (որոնք ամենայն ման-րամասնությամբ են նկարագրել իրենց հերոսներին), հայ պատմիչները շատ ժլատ են իրենց հերոսների նկարագրության մեջ։ Այս տեսակետից բացառու-թյուն է կազմում պատմահայր Մովսես Խորենացին։ Նրա հերոսների նկարա-գրությունը պարունակում է նաև մարդաբանական այնպիսի տվյալներ, որ-որոնք անտեսելը անհնար է։ Հայերի առասպելական նահապետը՝ Հայկը, Խո-րենացու նկարագրությամբ, հանդես է գալիս որպես «գեղապատշաճ և անձ-նեայ, քաջագանգուր, խայտալի և հաստաբազուկ» (գիրք 1, գլուխ Ժ)։ Հա-յոց Տիգրան թագավորի մասին նա ասում է. «Խարտեաշս այս և Կաղեբեկ ծայրի հերաց Երուանդեանս Տիգրուսն, երեսօր զունեան և Կաղեբեկն, անձ-նեայն և թիկնաւէտն, առոգաբարձն և գեղեցկուտն» (I, ԻԴ)։ Հայկի սերնդից Հրաչյայի անունը Խորենացին հետևյալ կերպ է ստուգաբանում. «Սա Հրաչյա է կոչվում առավելապես պայծառ երես և բոցավառ աչքեր ունենալու համար» (I, ԻԲ)։ Խորենացու հերոսներից մեկը կրում է Վարդգես անունը, մեկ ուրիշը ունի «դեղձան հերք»։

Անհամեմատ ավելի շատ արժեքավոր տվյալներ է պարունակում վիշա-պաբաղ Վահագնի մասին եղած առասպելը, հատկապես այն հատվածը, որ-տեղ պատմվում է Վահագնի ծննդյան մասին։ Գրանցելով հայ գուսանների երգերը Վահագնի մասին, Խորենացին մեղ է հասցրել շատ գողտրիկ պատա-ռիկ, որտեղ ասվում է. «Ընդ հղեզան փող ծուխ ելանէր, ընդ եղեզան փող բոց ելանէր, և ի բոցոյն վազէր խարտեաշ պատանեկիկ. նա հուր հեր ունէր, [ապա թէ] բոց [ունէր] մօրուս, և աչկունքն էին արեգակունք» (I, ԼԱ)։

47 Г. Ф. Дебеч, Палеоантропология СССР, т. 2 295—319.

48 В. П. Алексеев, նշվ. աշխ., էջ 148.

հորենացին իր հերոսներին դյուցազնական կերպարանք տալով, նրանց վերագրելով առնական գեղեցկություն, բարձր հասակ, հաղթ բաղուկ և լայն թիկունք, չափակցված անդամներ, միաժամանակ տալիս է նաև բնորոշ մարդաբանական հատկանիշներ ու տվյալներ:

Հայկի նկարագրության մեջ հանդիպող «խայտակն» բառը ուսումնասիրողներին Դ. Վանցյանը⁴⁹ ստուգաբանում է որպես «կապույտ աչի», որը չէր ընդունում Հ. Տաշյանը⁵⁰: Վերջինս այն ստուգաբանում էր որպես «խայտացող աչք», այնպես, ինչպես իր ժամանակին ստուգաբանված էր Հայկազյան բառարանում՝ «խայտ կամ խայտալից աչք, զվարթագին, քաղցրահայացք»:⁵¹ Հ. Աճառյանը (Արմատական բառարան, տես «խայտ» բառի տակ) այն ստուգաբանում է որպես խայտ-բիծ, պիսակ, անջատելով այն խայտալ-ուրախանալ բառից: Ըստ այդ բացատրության, խայտակն նշանակում է «աչքի մեջ, սպիտակուցի վրա բիծ կամ նշան ունեցող»:

Ստուգաբանության կարիք է զգում նաև «մեղուակն» բառը: Հայկազյան բառարանի կազմողներն այդ բառը բացատրել են՝ «ակն է իբրեւ զաչս մեղուաց, մեղուչ, անուշահայեաց, քաղցրատեսիլ»: Այսպիսի ստուգաբանությունը երբեք վերջնական չպետք է համարել: Միանգամայն ձիշտ են Պ. Էսապալյանի փորձերը, երբ նա ավելի պարզեցնելով այդ բառի իմաստը, այն կապում է մեղր բառի հետ, որից և «մեղուակն» ստուգաբանում է որպես մեղրագույն-շագանակագույն աչք⁵¹: հորենացու հերոսներն ունեն գանգուր, խարտյաշ, հուր, շեկ, վարդագույն, դեղձան մազեր, բոցագույն մորուք, բոցապայծառ, մեղրագույն (շագանակագույն), բոցակնագույն աչքեր:

Երբեք չպետք է մտածել այն մասին, թե իբրև հորենացին իր հերոսներին ավելի գեղեցիկ պատկերելու համար մտացածին մարդաբանական հատկանիշներ է նրանց վերագրել: Կասկած չի կարող լինել, որ շրջապատում տեսնելով վերը նկարագրած հատկանիշներն ունեցող մարդկանց, հորենացին իր հերոսներին միջոցով պատկերել է իրեն ժամանակակից հայերին:

հորենացու մոտ և ոչ մի տեղ հիշատակություն չկա թուխ և սև մազերի ու աչքերի մասին, չնայած որ թե՛ նրա ժամանակակից, և թե՛ հետագայի հայ պատմիչներն ու բանաստեղծները հայերին նկարագրել են նաև թուխ մազերով ու թուխ մաշկով: հորենացու ժամանակակից պատմիչներից Փավլոստոս Բուզանդը նկարագրելով հայոց Արշակ թագավորին, գրում է, որ նա «թավ է մազերով և թուխ է գունով»⁵²: Բուզանդը հայերին թավ ու թուխ մազերով և մաշկի գույնով ներկայացնելու մեջ բացառություն չի կազմում: Միջնադարյան հայ տաղասացները քիչ տողեր չեն նվիրել հայ կնոջ գովաբանմանը, նրա գեղեցկության նկարագրմանը: Այսպես, օրինակ, Գրիգորիս Աղթամարցու մոտ հայ կինը ունի վարսեր՝ «ինչպես թուխ սաթը», նաղաշ Հովնաթանի մոտ՝ «սիահ ծամեր», Հովհաննես Թլկուրանցու մոտ՝ «սպիտակ ձակատ, թուխ-թուխ աչքեր», նահապետ Քուչակի մոտ՝ «թուխ աչք, թուխ ունք, թուխ մազեր»:

49 Գ. Վանցյան, Դիտողություններ հորենացու մասին. Ա. Հին հայոց տիպարն ու հաշակն ըստ հորենացու, «Արարատ», 1900, էջ 186—190:

50 Հ. Տաշյան, Ուսումն դասական հայերէն լեզուի, Վիեննա, 1920, էջ 40—42:

51 Պ. Էսապալյան, Հայերը մարդախոսական տեսակետե, «Հանդես ամսօրյա», 1934, № 11—12, էջ 543:

52 Փավլոստոս Բուզանդ, Պատմութիւն հայոց, Վենետիկ, 1832, էջ 122:

Ներկայումս դժվար է ասել, թե ինչ նկատառումներով է խորենացին առաջնորդվել իր հերոսներին տիպավորելու հարցում, երբ իր իսկ ժամանակակից, ինչպես բաց գույնի մաշկ և շեկ մազեր, պայծառ դույնի աչքեր, այնպես էլ թուխ մաշկ և մազեր ու սև աչքեր ունեցող հայերի մեջ առաջնությունը տալիս է շեկ տիպի ներկայացուցիչներին: Ամենայն հավանականությամբ, խորենացու մոտ գեղեցիկի հասկացողությունը, իր հերոսների արտաքին, մարմնական հատկանիշների նկարագրման ժամանակ, առնչվել է առաջին հերթին անձնական ընկալումների և անտիկ աշխարհի վիպական հերոսների կողքին միևնույն աստիճանին հայ դյուցազուններին կանգնեցնելու հետ:

Միջնադարյան վերոհիշյալ աղբյուրների վկայությունները ուսումնասիրողներից ոմանց հետևությունն այն է, թե հայերը երկու տարբեր ժողովուրդների ձուլումից առաջ եկած ժողովուրդ են: Ձուլման այդ պրոցեսը իբր թե ընթացել է շեկ և թուխ գույն ունեցող ժողովուրդների պայթարով, որի ընթացքում հաղթող են հանդիսացել թուխերը, որոնք թվով շատ էին և ավելի կենսունակ: Սակայն ձուլվելով թուխերին, շեկ տիպը լիովին չանհետացավ և հարատևել է առ այսօր⁵³: Այս առումով առանձնակի հետաքրքրություն են ներկայացնում ժամանակակից հայերի մարդաբանական ու մարմնական տվյալները:

Մարդաբանության մեջ ընդունված է մարդու միջին հասակը համարել 165 սմ: Ինչպես ցույց են տվել տարբեր ժամանակներում և տարբեր վայրերում կատարված դիտումները, հայերի հասակի բարձրության միջինը այդ թվից բարձր է: Շանթրը Հայաստանում չափել է 297 տղամարդու, որոնց միջին բարձրությունը ստացվել է 168 սմ, իսկ կանանցը (44 հոգու)՝ 153 սմ: Երևանում և Գորիսում Շանթրը հանդիպել էր տղամարդկանց, որոնց բարձրությունը հասնում էր 182 սմ⁵⁴, է. Պիտարը Դոբրուջայում չափագրելով ռումինահայերին, նրանց հասակի միջին բարձրությունը համարել էր 166 սմ: Հարյուր հայի չափագրության մեջ հասակի բարձրությունը, տոկոսային հարաբերությամբ, ըստ Պիտարի դիտումների, ուներ հետևյալ պատկերը⁵⁵.

160 սմ-ից ցած —	19,70 %
160—165 սմ—	15,78 %
165—170 սմ—	42,08 %
170-ից բարձր—	22,35 %

Ըստ Գ. Մ. Աբդուշելիշվիլու դիտումների, Ալավերդու շրջանում տղամարդու միջին բարձրությունը կազմում է 167,7 սմ (100 մարդ), Նոյեմբերյանի շրջանում՝ 166,2 սմ (101 մարդ), Աշտարակի շրջանում՝ 165,9 սմ (102 մարդ), Գորիսի շրջանում՝ 166,9 սմ (101 մարդ), Մեղրու շրջանում՝ 164,7 սմ (100 մարդ), Արտաշատի շրջանում՝ 164,6 սմ (100 մարդ), Եղեգնաձորի շրջանում՝ 164,2 սմ (100 մարդ), Կալինինոյի շրջանում՝ 165,8 սմ (100 մարդ), Կամոյի շրջանում՝ 166,4 սմ (100 մարդ), Թալինի շրջանում՝ 167,9 սմ (100 մարդ)⁵⁶:

⁵³ Պ. էսապալյան, նշվ. աշխ.

⁵⁴ E. Chantre, Armeniens, esquisse historique et ethnographique, „Bulletin de la Société d'anthropologie et de biologie de Lyon“, t. 13, Lyon et Paris, 1895.

⁵⁵ E. Pittard, Contribution à l'étude anthropologique des Arméniens, „Bulletin de la société roumaine des sciences“, Bucarest, t. XXI, 1912, էջ 341—348.

⁵⁶ Г. М. Абдушелишвили, Антропология древнего и современного населения Грузии, Тбилиси, 1964, էջ 154—155.

Տարբեր շրջաններում, տարբեր մարդաբանների կողմից չափագրված նյութի համեմատությունը նույնպես վկայում է հայերի միջին հասակից բարձր լինելը:

Ուսումնասիրողներ	Տվարյա- նովիշ	Անսերով	Էրիքսոն	Ջավախիշ- վիլի
Իրաված մարդկանց թիվը	105	112	103	886
Դիտումների ժամա- նակը	1926	1926	1907	1925
Մինչև 160 սմ	17,14%	21,4%	16%	12%
161—165 սմ	17,14%	37,5%	59%	59%
166—170 սմ	38,1%	25,9%	—	—
171 սմ բարձր	27,66%	15,2%	25%	—
Միջինը	—	165,5	166,18	167,1

Ինչպես ցույց են տալիս վերոհիշյալ տվյալները, հայերի հասակի միջին բարձրությունը կազմում է 165—167 սմ, այսինքն՝ հայերի հասակը ընդհանուր միջին հասակից բարձր է⁵⁷:

Ապացուցված է, որ մարդու մաշկի գույնը էապես կախված է գունանյութի (pigment) պարունակությունից, որը մասամբ մաշկի և մասամբ էլ եղջերամորթի բջիջների մեջ է կուտակված: Մաշկի գույնի տարբերությունը փաստորեն կախված է գունանյութի խիտ կամ նոսր խմբավորման աստիճանից, և թե՛ աշխարհագրական, թե՛ կլիմայական պայմանների ազդեցությունը շատ չնչին է: Հայերի մաշկի գույնը հիմնականում թուխ է: Ս. Ջավախիշվիլին 100 հայի վրա դիտումներ կատարելիս նկատել է մաշկի գույնի հետևյալ հարաբերությունը. սպիտակ՝ 3 %, թուխ՝ 85 %, խիստ թուխ՝ 12 %:

Հայերի մոտ գերակշռում է նաև մազերի թուխ գույնը՝ իր մերձավոր եւրանոներով: Քիչ չեն հանդիպում նաև շիկահեր հայեր: Ինչպես հայտնի է, հնդեվրոպական մարդաբանական տիպը բնորոշվում է նաև մազերի շեկ գույնով, որը գերակշռում է: Շանթրի դիտումների համաձայն, շեկ մազերով հայերը հազվադեպ են, թեև նրա ուսումնասիրած 341 հայերի մեջ շեկ մազ ունեցողների թիվը կազմում էր 11 %: Ջավախիշվիլին իր ուսումնասիրած 729 հայերին, մազերի գույնի տոկոսային հարաբերությամբ, բաժանել է հետևյալ կերպ՝ բաց գույնի շեկ՝ 6 %, մուգ շեկ՝ 27 % և 67 %՝ սև կամ թուխ: Մ. Գ. Աբդուլեիշվիլու կողմից Հայաստանի տասը շրջաններում 806 հայերի դիտումների ժամանակ մուգ շեկ գույն ունեցողները կազմել են ընդամենը 14,7 %:

57 И. К. Тварьянович, Материалы к антропологии армян, С. Петербург, 1897; Э. В. Эрикссон, К антропологии армян, «Русский антропологический журнал», 1907. № 3—4; Н. И. Ансеров, Нахичеванские на Дону армяне в антропологическом отношении, «Русский антропологический журнал», 1926, № 15; A. Dschawachisch-will, Die Rassenzusammensetzung der Kaukasus — Völker, „Archiv für Anthropologie“, Bd. XX, 1927, էջ 77—80.

Հայերի մազերը խիտ են: Քիչ են պատահում սակավամազ մարդիկ: Դիտումները ցույց են տալիս, որ միջին խտության մազ ունեցողների թիվը 30 %-ից չի անցել, իսկ թավ մազ ունեցողները մշտապես գերակշռել են (68—70 %): Հայերի մազերի ձևը հիմնականում հարթ է, քիչ չեն նաև ալիքաձև մազեր ունեցողները:

Հիմնականում թուխ է նաև հայերի աչքի գույնը: Շանթրը 341 հայերի մոտ հանդիպել է սև գույնի աչք ունեցող 192 մարդու (56 %), շագանակագույն՝ 113 մարդու (33 %), կապույտ կամ բաց գույն՝ 36 մարդու (11 %): Ա. Ջավախիշվիլու կողմից դիտված 2141 հայերի մեջ բաց գույնի աչք ունեցողները կազմել են 9 %, թուխ գույն ունեցողները՝ 81 %, այլ գույներ ունեցողները՝ 10 %: Սովետական Հայաստանի 10 շրջաններում Աբդուշելիշվիլու կողմից ուսումնասիրված 1000 հայերի մոտ բաց գույնը կազմել է 6 %, տարբեր գույները՝ 66 %, իսկ թուխը՝ 28 %:

Ժամանակակից հայերն իրենց տիպին բնորոշ առանձնահատուկ շեշտված քիթ ունեն: Ինչպես ցույց են տալիս մարմնական տվյալները, հայերի քիթ արմատը միջակ է ու նեղ, քիթ ետևի մասը՝ միջակ նեղ, ուռուցիկ ու հարթ, քիթ ծալը՝ հաճախ խիստ, նաև թեթև կոր: Հանդիպում են նաև քիթ թևերը բարձր, թեթև կամարաձև, երբեմն ուղիղ, միջնորմը ավելի վար ցցված, երբեմն հորիզոնական քիթ ունեցող հայեր:

Հայերն ունեն հիմնականում նուրբ և բարձրարմատ քիթ, բերանը սովորաբար փոքր է, ականջը՝ բնական աճած, հիմնականում՝ մեծ, քան փոքր:

Ժամանակակից հայերի գանգաբանական տվյալների համաձայն հայերի մեծագույն մասը կարճագանգ է ու լայնագեմ, շնայած երբեմն հանդիպում են միջազուրիսներ: Երկարագանգեր համարյա չկան: Ա. Ջավախիշվիլին 833 հայերի մոտ գտել էր 1 % երկարագանգ, 3 % միջագանգ և 96 % կարճագանգ:

Հնէամարդաբանական նյութերը ցույց են տալիս, որ արդեն մ. թ. ա. I հազարամյակի սկզբներից Հայկական լեռնաշխարհում ապրող տեղաբնիկ ցեղերը մարմնական ու գանգաբանական տեսակետից կազմում էին մարդաբանական հատկանիշների մի ընդհանրություն, որը հիմնականում պահպանվել է և հանդես է գալիս ժամանակակից հայերի կերպարով:

* * *

Ողջ նյութի քննարկումը հնարավորություն է տալիս գալու հետևյալ հիմնական եզրահանգման.

Առաջավոր Ասիայում հնագույն ժամանակներից սկսած գերիշխել է դոլիխոսկրան (երկարագանգ) մարդաբանական տիպը: Այս նույն տերիտորիայում էլ հետագայում առաջացել և կազմավորվել է ժամանակակից բրախիկրան (կարճագանգ) առաջավորասիական կամ արմենոիդ տիպը:

Առաջավորասիական մարդաբանական տիպի ներկա տարածման տվյալները ցույց են տալիս, որ նրա ձևավորումը տեղի է ունեցել մոտավորապես այն տերիտորիայում, որտեղ տարածվել էր և այժմ էլ դոլություն ունի: Մարդաբանական այս տիպը դեռևս հեռավոր ժամանակներում լայնորեն տարածվել էր Միջագետքում, նրա հարավից մինչև Տիգրիսի ու Եփրատի վերին հո-

սանքները, Փոքրասիական բարձրավանդակի, Հայկական լեռնաշխարհի և Հյուսիսային Իրանի մեծ մասում:

Հիմնավորված չէ որոշ մարդաբանների այն տեսակետը, ըստ որի արմենոիդ տիպը Առաջավոր Ասիայում հնագույն ժամանակներում ընդհանրապես գոյություն չի ունեցել, թե այստեղ հիմնականում տիրապետող է եղել երկարադանգ տիպը, իսկ կարճադանգը միայն վաղ բրոնզի դարաշրջանում է սկսում հանդես գալ, որը բացատրվում է դեպի Առաջավոր Ասիա հնդեվրոպական ցեղերի կատարած ներգաղթով: Ըստ այդ տեսության, բրոնզի դարի ողջ ժամանակաշրջանում Առաջավոր Ասիայում միմյանց կողքի գոյություն ունեին երկարադանգ և կարճադանգ ցեղեր, որոնք հետագայում ձուլվեցին: Զուլման այդ պրոցեսում հաղթող դուրս եկավ ներգաղթ կատարած կարճադանգ տիպը:

Իրոք, դժվար է ժխտել մարդաբանական հարուստ նյութերով հիմնավորվող այն փաստը, որ Առաջավոր Ասիայում (այդ թվում և Հայկական լեռնաշխարհում) գոյություն ունեւ և հնագույն ժամանակներից (էնեոլիթ) գերիշխող էր երկարադանգ մարդաբանական տիպը և որ բրոնզի դարաշրջանում հանդես է գալիս նաև կարճադանգը: Եվ վերջապես, երկաթի և նրան հաջորդող պատմական ժամանակաշրջաններում գերակշռությունը անցնում է կարճադանգ տիպին, և երկարադանգ տիպն անհետանում է:

Մարդաբանների վերոհիշյալ տեսությունը հիմնավորվում էր նաև այն շատ կարևոր փաստով, որ Առաջավոր Ասիա (ինչպես և Հայկական լեռնաշխարհ) ներգաղթած հնդեվրոպական ցեղերը տեղաբնիկներին պարտադրեցին իրենց լեզուն, որը և գերիշխեց հետագայում: Լեզվագիտական տեսանկյունից բացառված չէ, որ ցեղերի կամ ժողովուրդների հոծ զանգվածները կարող են ժառանգել քանակով ավելի փոքր ցեղերի կամ ժողովուրդների լեզուն, հատկապես, երբ վերջիններս, լինելով հզոր և տիրապետող, կարող էին նրանց պարտագրել այն:

Ցեղասերման պրոցեսում ֆիզիկական (մարդաբանական) ժառանգությունը միանգամայն հակառակն է ցույց տալիս: Մարդաբանական տեսակետից, կազմավորված ժողովուրդների ժամանակակից տիպերը հիմնականում շարունակում են պահպանել այն նախնիների մարմնական ու գանգաբանական հատկանիշները, որոնք մեծամասնություն էին կազմում, եթե նույնիսկ փոքրամասնությունը առաջիններին պարտադրել էր իր լեզուն:

Այն հարցին, թե ինչպես երկարադանգ տիպը Հայկական լեռնաշխարհում տեղի տվեց կարճադանգ տիպին, և վերջինս դարձավ կազմավորված հայ ժողովրդի մարդաբանական կերպարը, պետք է տալ միայն մեկ պատասխան. այս խնդրի հնարավոր և լավագույն բացատրությունն այն է, որ մարդաբանությունն այստեղ գործ ունի սովորական բրախիկեֆալիզացիայի (կարճագլխայնացման) պրոցեսի հետ, որի ընթացքում զգալի դեր է կատարել նաև եվրոպեոիդ երկու մեծ ռասաների՝ նախակերպային մի շարք առանձնահատկություններ պահպանած զանգվածեղ և լայնադեմ տիպի ու եվրոպեոիդ ռասայի հարավային ճյուղի մեջ մտնող նեղադեմ տիպի փոխներգործությունը:

Վաղ երկաթի դարաշրջանից սկսած այլ ռասաների ներկայացուցիչների հետ շփումները Հայկական լեռնաշխարհի տեղական բնակչության մարդաբանական կազմի ձևավորման վրա որևէ նշանակալից ազդեցություն չեն թողել:

**СОВРЕМЕННОЕ СОСТОЯНИЕ ИЗУЧЕНИЯ ЭТНИЧЕСКОЙ
АНТРОПОЛОГИИ АРМЯН**

Л. А. БАРСЕГЯН

(Резюме)

В статье проблемы этногенеза армян рассматриваются в свете антропологических данных. Эти данные приводят к выводу, что современный переднеазиатский антропологический тип, известный в науке еще и как арменоидный, в историческое время формировался на той территории, на которой он существует и сейчас. Не обоснована теория, утверждающая, что в древние времена не существовал арменоидный тип, выступающий якобы на Армянском нагорье после появления индоевропейских племен.

Анализ антропологических данных показывает, что современный антропологический тип армян возник до образования армянского народа и армянского языка и с тех пор не претерпел каких-либо существенных изменений.